

## Opi Siebesiech

© Schwiizergoofe GmbH / Nikol Camenzind & Georg Schlunegger



### Eis, zwei, drü, vier, foif, sächs, siebä 2x

Mit äm Abwäschtüächli ufem Chopf  
ä Safari um dä Bluämätopf.

Am Länkrad vorne uf dim Schoos  
stüür ich s'Auto dur s'Garaschtor.

Mit Schrubazücher und Bohrmaschina  
scho gfliggti Sacha goh repariara.

Und klappt's mol nöd bim erschte Versuech  
wird aifach mol luut usegfluecht.

Opi we mir loufe zäme  
und i dini Hand cha häbe,  
wenn du mi i d'Luft ufespicksch  
isch das für mi z'gröschte Glück.

**Min Opi isch ä  
drü, viär, foif, sächs, Siebesiech.  
E riese Chindschopf, so wien ich.  
Hey Opi du bisch voll de Chef,  
will du di beschte Idee hesch.**

**Drü, viär, foif, sächs, Siebesiech.  
E riese Chindschopf so wien ich.  
Uf dim Arm da föhl ich mich  
sälber wie nä föif, sächs, Siebesiech.**

### Eis, zwei, drü, vier, foif, sächs, siebä 2x

Wenn miir zwäi amme zämme sitze,  
denn machsch duu die beschte Witze.

Aui die wo d'nie würsch säge,  
wär z'Grossmami ou dernäbä.

Mit dim alte Ruederboot,  
so wie früener de Columbus scho,

wem mer Amerika go entdecke.  
Das seig ja grad da um de Egge.

Opi we mir zäme si,  
denn geit d'Ziit so schnäll verbi.

Wenn du mir e Kuss uf Backe drücksch  
isch das für mi z'gröschte Glück.

**Refrain**

**Min Fründ, mis Vorbild und mi Held,  
de Stärchtscht, de Muetigscht, bescht Kolleg**

**Refrain**

**Eis, zwei, drü, vier, foif, sächs, siebä 2x**